

26. august 2014

UKA 2014/106

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

Suliffissaaleqineq akiorniarlugu pilersaarutit suliniutillu sumut killissimanerat pillugu Naalakkersuisut UPA2015-mi saqqumiunneqartussamik nalunaarusiornissamik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Ruth Heilmann, Siumut)

Tungavilersuut

Inatsisartut upernaag manna ataatsimiinneranni suliffissaaleqineq pillugu Naalakkersuisut suliniuteqarnissaat aalajangiunneqarpoq. Taakkua sulissutigineqartussat pillugit Naalakkersuisut UPA2015-mi qanoq ittunik suliniuteqarsimanertik pillugu nalunaarusiornissaat matumuuna siunnersuutigaa.

Suliffissaaleqineq annertoq atugaatillugu ilaqutariinni ajornartorsiutaasut anigorneqarnissaat imaaliinnarluni anguneqarsinnaasanngillat. Ilaqutariinni pilersuineq unittooraangat ilaqutariinnut ingammillu meerartalinnut pilersorneqartussanut annertuumik kingunerluuteqalersamat. Inigisamut akilersuisinnaajunnaarnerup aamma nassatarisarmagu inigisamit anisinneqartarnerit. Tassalu ilaanni nammineq pisuussutiginagu taamatut kingunerluuteqartarpoq naak inuiaqatigiinni suliffissaaleqinerup nassatarisaanik taamatut ilaqutariit nammineq pisuussutiginngisaminnik atugaqalertinneqartartut.

Taamaattumik angajoqqaat pilersuinissaminnik pisinnaatinneqartuassagunik periarfissaqartuassagunillu suliffiit ataavartut pilersinneqarnissaat pisariaqavippoq. Ingammillu inuusuttut aamma napaarliinnannginnissaat ikiorsiissutinillu atuinnissaminnik taamaallaat isumalluuteqannginnissaat anguniarlugu suliniuteqarnissaq pingaaruteqartorujussuurtut isigalugu nunatsinni suliffissanik nutaanik pilersitsinissamik suliniutaasut annertunerpaaffianiitinneqartariaqarput. Minnerunngitsumillu inuusuttut ilinniagaqarnissaannik siunnersuinerit pitsaanerpaaffianiitinnissaat anguniarlugu iliuseqartuarnissaq anguniarneqartariaqartoq.

Tamannaluuna pillugu upernaag Inatsisartut annertoorujussuarmik sakkortuumillu oqallittut isumagalugu ullumikkut siunissamilu suliffissaaleqinerup minnerpaaffimminiilernissaa anguniarneqassasoq. Taamaattuminguna Naalakkersuisut qanoq iluseqartumik suliniuteqarnertik Inatsisartunut nalunaarusianngorlugu 2015-mi upernaakkut ataatsimiinnissamut saqqummiussinissaat pingaartikkiga.

Siunnersuutip aningaasatigut allaffissornikkullu pisortanut kinguneqaatissai

Nalunaarusiamik suliaqarneq allaffissornikkut aningaasartuutaanissaa naatsorsuutigineqarpoq, tamanna ukiup affaanik sulinermik naleqassaaq (250.000 kr. missaani).

Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai
Soqanngilaq.

Siunnersuutip innuttaasunut allaffissornikkut aningaasatigullu kinguneqaatissai
Soqanngilaq.